



## KEMENTERIAN PERTANIAN DAN KETERJAMINAN MAKANAN

*Ministry of Agriculture and Food Security*

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : [www.kpkm.gov.my](http://www.kpkm.gov.my)

---

## SIARAN MEDIA

### OPERASI BERAS PUTIH (OP BP)

### PASTIKAN BEKALAN MENCUKUPI DENGAN HARGA STABIL DAN DIKAWAL

**PUTRAJAYA, 28 JUN 2023** – Kementerian Pertanian dan Keterjaminan Makanan hari ini mengadakan Operasi Beras Putih atau OP BP bertujuan untuk memastikan pengguna sentiasa mendapat bekalan beras yang mencukupi dengan harga yang stabil dan dikawal.

Operasi diketuai Timbalan Menteri Pertanian dan Keterjaminan Makanan, Tuan Chan Foong Hin bersama Ketua Pengarah Kawalselia Padi dan Beras (KPB), Datuk Azman Mahmood serta pasukan penguatkuasa KPB.

OP BP kini giat dijalankan oleh penguatkuasa KPB bermula 19 Jun lalu melibatkan pemeriksaan stok dan bekalan di pasaraya, *hypermarket* dan kedai runcit di seluruh negara. Pemantauan tertumpu kepada bekalan dan harga beras putih tempatan (BPT) dan beras putih import (BPI).

Kementerian menerusi KPB komited menguatkuaskan pemeriksaan demi memastikan tidak ada kenaikan harga bagi beras putih tempatan. Harga kawalan maksima beras putih tempatan di peringkat pengguna adalah dikawal pada kadar RM2.60/kg seperti mana yang termaktub di dalam peruntukan Akta Kawalan Padi dan Beras 1994 [Akta 522].

Kementerian turut melaksanakan tindakan awal dengan membuat penetapan harga kawalan maksima jualan beras putih tempatan di peringkat kilang dan borong. Manakala penetapan harga bagi beras putih import tidak dikawal oleh Kerajaan.

Menurut Chan, rakan strategik Kementerian seperti pihak BERNAS turut mengambil inisiatif dengan membuat penambahan sebanyak 30% untuk beras putih import bagi menampung permintaan yang meningkat di pihak pemborong.

Berdasarkan pemantauan yang dijalankan, harga pasaran beras putih import ditawarkan di peringkat runcit adalah diantara RM28 ke RM32 bagi setiap kampit untuk beras 10 kilogram. Pada masa ini, pengguna masih boleh membuat pilihan bagi mendapatkan beras putih import dengan harga yang rendah di dalam pasaran.

Operasi dan pemantauan oleh Kementerian akan terus diadakan demi menjamin bekalan beras negara sentiasa stabil serta mencukupi, selain melindungi kepentingan pengguna dan juga golongan pesawah.

**KEMENTERIAN PERTANIAN DAN KETERJAMINAN MAKANAN**

**28 JUN 2023**